

四庫全書

經部

欽定四庫全書

經部

五禮通考卷一百七十六

詳校官太常寺少卿臣陳桂森

給事中臣溫常綬覆勘

總校官進士臣繆琪

校對官中書臣李荃

謄錄監生臣徐紹城

欽定四庫全書

五禮通考卷一百七十六

刑部尚書秦憲田撰

嘉禮四十九

學禮

憲田案養老之禮自虞夏殷以來已重之至周而大備其所養之老有三曰國老曰庶老曰死政之老每歲仲春季春仲秋之月天子

親視學大合樂擇公卿大夫之致仕有賢德者以為三老五更天子袒而割牲執醬而饋執爵而酌尊之如父兄其羣老皆設席位禮之如衆賓欲陳孝弟以教天下也其餘如簡不帥教出征受成於學以訊馘告凡天子有事於學必舉養老之禮而諸侯之國及鄉遂之吏亦皆得養老於學焉若庶人之老不能徧養於學則有引年復除之令而又制民田

里教之樹畜尊其妻子使養其老孟子所謂
善養老者是也養老之禮散見於月令王制
祭義內則樂記諸篇而文王世子尤為詳備
今以類編入學禮而經傳所載優老之事亦
附焉後世舉視學養老之典者惟後漢及魏
與後魏及周至於優禮高年之事則歷代史
冊皆不絕書今並蒐輯以著於篇

禮記祭義先王之所以治天下者五貴老為其近於親也

敬長為其近於兄也是故至孝近乎王雖天子必有父

至弟近乎霸雖諸侯必有兄

注天子有所父事諸侯有所兄事謂養三老五更也

昔者有虞氏貴德而尚齒夏后氏貴爵而尚齒殷人貴

富而尚齒周人貴親而尚齒

注貴謂燕賜有加於諸臣也尚謂有事尊之於其黨

也臣能世祿曰富舜時多仁聖有德後德則在小官

疏此論四代弟順尚齒之義虞氏帝德弘大故貴德德之中

年高者在前は德中尚齒夏后氏尚功功高則爵高既貴其爵德雖下而爵高者則貴之於貴爵之中年高者在前は故云尚齒殷家累世有功世爵而富乃貴之亦年高者在前周人敬愛彌狹殷人疏而富者猶貴之周人於已有親乃貴之就此之中亦年高者在前に

輔氏廣曰有德者必有壽有爵者必有富此虞夏殷之所貴如此至於周則又厚親以反本焉此世變使然聖人因時定制也若夫年齒之尚行乎萬世而不可變者

虞夏殷周天下之盛王也未有遺年者年之貴乎天下

久矣次乎事親也

注言其先老也 疏次乎事親者言貴年之次第近乎事親之孝

呂氏澄曰此承上文申言四代皆尚齒之義遺謂忽忘之與違其親之違同年即齒也四代之所貴雖有不同而其尊年尚齒則一蓋年齒之可貴於天下歷四代至今不變故曰久矣尚齒之弟次乎事親之孝也

方氏懋曰或曰年或曰齒年以所歷言齒以所序言

王制司徒養耆老以致孝

注耆老所當孝養上之人養耆老則民皆知孝矣

大學上老老而民興孝上長長而民興弟

周禮地官大司徒以保息六養萬民二曰養老

注養老七十養

於鄉五十異糧之屬

疏王制云五十養於鄉六十養

於國七十養於學彼謂大夫士也王制又云凡三王養

老皆引年注云已而引戶校年當行復除也老人衆多

非賢者不可皆養故食貨志云七十已上上所養也此

云七十養於鄉亦謂有賢行者也五十異糧之屬者是

王制文禮記常法庶人食糗士兼食黍大夫又加以粱

今雖庶人至五十或與士大

夫同食食黍粱故云異糧

孟子伯夷辟紂居北海之濱聞文王作興曰盍歸乎來

吾聞西伯善養老者太公辟紂居東海之濱聞文王作
興曰盍歸乎來吾聞西伯善養老者天下有善養老則
仁人以為已歸矣

白虎通德論王者父事三老兄事五更者何欲陳孝
悌之德以示天下也故雖天子必有尊也言有父也
必有先也言有兄也

慈田案以上總論養老之義

禮記王制有虞氏養國老於上庠養庶老於下庠夏后

氏養國老於東序養庶老於西序殷人養國老於右學

養庶老於左學周人養國老於東膠養庶老於虞庠虞

庠在國之西郊疏養老必於學者教孝悌之處故於中養老熊氏云國老謂卿大夫致仕者庶

老謂士也皇氏云庶老兼庶人在官者其致仕之老大夫以上當養從國老之法士養從庶老之法故外饗云

邦饗者老掌其割烹鄭注引此周人養國老於東膠養庶老於虞庠是也

陳氏禮書貴胄謂之國子則貴而老者謂之國老賤

者謂之庶人則賤而老者謂之庶老國子與庶人之

秀者同其學所以一道德國老與庶老異其學所以

別分義

蕙田案庶老謂士以下致仕者若庶人之老
別有引年之法不養於學也陳氏指庶人之

老言非

丘氏濬曰王者之養老所以教天下之孝也而必於
學者學所以明人倫也人倫莫先於孝弟老者之於
君以德則君尊也以齒則老者先也人君致孝弟於
其親長下之人無由以見也故於學校之中行養老
之禮使得於聽聞觀感者曰上之人於夫人之老者
尚致其敬如此矧其親屬乎萬乘之尊且如此吾儕
小人所宜興起感發也噫老吾老以及人之老長吾
長以及人之長一禮之行所費者飲食之微而所致

者治效
之大也

君子者老不徒行庶人者老不徒食

注徒猶空也徒行謂無車徒食謂無

肉

周禮地官遺人門關之委積以養老孤

注委積者廩人倉人計九穀之

數足國用以其餘共之所謂餘法用也

少曰委多曰積

門關以養老孤人所出入易以取餼廩也

疏門謂十

二國門關謂十二關門出入皆有稅所稅得者亦送帳

多少足國用之外留之以養老孤故司門云以其財養

死政之老

與其孤

司門以其財養死政之老與其孤

注財所謂門關之委積也死政之老死國

政事者之
父母也

禮記王制少而無父者謂之孤

疏孤顧也顧望無所瞻見也

老而無

子者謂之獨

疏獨鹿也鹿無所依也

老而無妻者謂之矜

疏劉熙釋名曰

無妻曰鰥愁悒不能寐目恒鰥鰥然其字從魚魚目恒不閉

老而無夫者謂之寡

疏

保也保此四者天下之窮而無告者也皆有常餼注餼廩也

皇氏侃曰人君養老有四種一是養三老五更二是子孫為國難而死王養死者父祖三是養致仕之老

四是引戶校年養庶人之老

陳氏禮書天子之於老也其所養也三國老也庶老

也死政者之老也羅氏獻鳩以養之者國老也司徒以保息養之者庶老也司門以其財養之者死政者之老也若夫外饗酒正稟人所謂耆老者總三者而言之也先王父事三老兄事五更則三老五更乃羣老之尤者而致仕之老者固在其間皇氏離而二之誤矣

慈田案以上論國老庶老及死政之老

周禮夏官羅氏仲春養國老

禮記月令仲秋之月養衰老

陳氏澹曰月至四陰陰已盛矣時以陽衰陰盛為秋人以陽衰陰盛為老養衰老順時令也

文王世子凡大合樂必遂養老

注大合樂謂春入學舍菜合舞秋頒學合聲於

是時也天子則視學焉遂養老者謂用其明日也疏月令季春大合樂亦在其中

陳氏澹曰常事合樂不行養老之禮惟大合樂之時人君視學必養老也

郊特牲春饗孤子秋食耆老飲養陽氣也故有樂食養

陰氣也故無聲凡聲陽也

疏案王制夏后氏養老以饗禮則夏家養老用春時有樂

無秋食之禮殷人養老以食禮而秋時不作樂無春饗之禮周人脩而兼用之則周人養老春夏用饗禮秋冬

用食禮四時皆用樂故文王世子云凡大合樂必遂養老注云春合舞秋合聲下云養老之禮遂發咏焉登歌清廟是秋合聲養老亦用樂也皇氏云春是生養之時故饗孤子取長養之義秋是成熟之時故食耆老取老成之義熊氏云春饗孤子亦饗耆老秋食耆老亦食孤子

大戴禮保傅篇春秋入學坐國老執醬而親饋之所以

明有孝也

盧辨注仲春舍菜合舞仲秋班學合聲

熊氏安生曰天子視學之年養老一歲有七謂四時皆養老凡四也又文王世子曰凡大合樂必遂養老注云大合樂謂春入學舍菜合舞秋頒學合聲通前為六又季春大合樂天子視學亦養老是總為七也

陳氏禮書天子之於老也歲養之也三仲春也季春

也仲秋也周禮羅氏羅春烏獻鳩以養國老在仲春
月令養衰老授几杖在仲秋文王世子曰凡大合樂
必遂養老鄭氏云大合樂謂春入學舍菜合舞秋頒
學合聲於是時也天子則視學遂養老此養老於仲
春仲秋者也月令季春之末擇吉日大合樂天子親
往視之亦必養老此又養老於季春者也若夫簡不
帥教出征受成以訊馘告凡天子入學莫不養老此
又不在歲養之數也月令無冬夏養老之文周禮禮

記特言春養秋食而已熊氏謂養老歲有七亦誤矣
意田案陳氏駁熊說極是

又案以上養老之時

禮記王制有虞氏皇而祭深衣而養老夏后氏收而祭
燕衣而養老殷人皞而祭縞衣而養老周人冕而祭玄

衣而養老

注凡養老之服皆其時與羣臣燕之服有虞氏質深衣而已夏而改之尚黑而黑衣裳殷

尚白而縞衣裳周則兼用之玄衣素裳其冠則牟追章甫委貌也疏深衣謂白布衣以質用白布而已縞白

色生

絹

馬氏晞孟曰祭所以追養繼孝而年之貴乎天下久矣次乎事親事也故先言祭而次言養老祭則言冠而不言衣養老則言衣而不言冠

方氏慤曰祭非無衣也然主冠言之者蓋冠在首有尊尊之義焉而祭所以推尊尊之義故也養老非無冠也然主衣言之者蓋衣在體有親親之仁焉而養老所以明親親之仁故也

蕙田案以上養老之服

曲禮大夫七十而致事若不得謝則必賜之几杖

月令養耆老授几杖

陳氏澹曰几杖所以安其身

詩大雅行葦肆筵設席授几有緝御

箋緝猶續也御侍也兄弟之老者既

為設重席授几又有相續代而侍者謂敦史也

疏敦史主侍老人故知續代而侍者為敦史

周禮秋官伊耆氏大祭祀共其杖咸

注咸讀為函老臣雖杖於朝事鬼神

尚敬去之有司以此函歲之既事乃去

之疏謂七十有德君不許致事者也

共王之齒杖

注王之所以賜老者之杖王制曰五十杖於家六十杖於鄉七十杖於國八十杖於

朝

鄭氏齔曰國老年齒已高在禮宜杖是之謂齒杖以齒論之雖可以杖必出於王之所賜然後杖伊耆氏之職則共之於王而王用以賜也周家之杖有五十六十七十八十在鄉在家在國在朝之異此所共者

其在朝在國者乎漢之哀帝賜
孔光以靈壽杖其有周舊典與

禮記王制五十杖於家六十杖於鄉七十杖於國八十

杖於朝

陳氏曰大夫七十而後賜之杖五十而杖者蓋
杖於家鄉國者不待賜杖於朝則非賜不可也

祭義七十杖於朝

蕙田案王制七十杖於國八十杖於朝謂已

致仕者祭義七十杖於朝謂未致仕者曲禮

所云七十而致事若不得謝則賜之几杖是

也

又案以上几杖

周禮天官外饗邦饗者老孤子則掌其割烹之事

注孤子者

死王事之子也王制曰周人養國老於東膠養庶老於虞庠疏邦饗者老者謂死事者之父祖兼有國老庶老國老謂卿大夫致仕者庶老謂士之致仕者經直言耆老對孤子則耆老者死事之父祖可知但此不見饗國老庶老之文故鄭解耆老謂國老庶老

程子曰外饗酒正皆言享耆老孤子則酒食未嘗偏廢也周官言享不言食亦以享未嘗無食也特以食為下爾言老足矣必曰耆老者容養之以六十而上為率與以六十養於國故也

酒正饗耆老孤子皆共其酒無酌數

注要以
醉為度

凡有秩酒者以書契授之

注所秩者謂老臣王制曰七十不俟朝八十月告存九十

日有秩疏秩常也老臣

年九十以上常與之酒

鄭氏鍔曰享禮之嚴凡設而不倚爵盈而不飲所以訓恭儉而此言共酒無酌數何也蓋此所謂享非大享也耆老之子孤子之父死於主事憫其憊獨無依或用酒以飲之所以念其功其享之也不過以醉為度示恩章之厚耳

地官掌人若饗耆老孤子士庶子共其食

疏耆老謂死王事者之父

國家春饗孤子秋食耆老則稟人共其食

夏官羅氏仲春羅春鳥獻鳩以養國老行羽物注春鳥

蟄而始

出者是時鷹化為鳩鳩與春鳥變舊為新宜以養老助生氣

禮記王制凡養老有虞氏以燕禮夏后氏以饗禮殷人

以食禮周人脩而兼用之

注凡飲養陽氣凡食養陰氣陽用春夏陰用秋冬兼用之

備陰陽也

疏有虞氏以燕禮者盧氏云燕禮脫屣升

堂崔氏云燕者敬烝於俎行一獻之禮坐而飲酒以至於醉有虞氏帝道宏大故養老以燕禮夏后氏以饗禮者崔氏云饗則體薦而不食爵盈而不飲依尊卑為獻取數畢而已夏貴尚以禮故養老以饗禮相養敬也殷人以食禮者崔氏云不飲酒享大牢以禮食之殷人質素威儀簡少故養老以食禮周人脩而兼用之者謂周人脩三代之禮春夏養老之時用虞氏燕禮夏后氏饗

禮秋冬養老之時用殷人食禮周極文故兼用之也皇氏云饗有四種一是諸侯來朝天子饗之則周禮大行人職云上公之禮其饗禮九獻是也其牲則體薦體薦則房烝故春秋宣十六年左傳云饗有體薦又國語云王公立飫則有房烝其所云飫即謂饗也立而成禮謂之飫也其禮亦有飯食故吞人云凡饗食共其食米鄭云饗有食米則饗禮兼燕與食也二是王親戚及諸侯之臣來聘王饗之禮亦有飯食及酒其酌數亦當依命數其牲則折俎亦曰餼烝也故國語云親戚宴享則有餼烝謂以燕禮而享則有之也左傳云饗有體薦宴有折俎公當饗卿當宴王室之禮也時定王享士會而用折俎以國語左傳觀之則知王親戚及諸侯之大夫來聘皆折俎饗也其享朝廷之臣亦當然也三是戎狄之使來王饗之其禮則委饗也其來聘賤故王不親饗但以牲全體委與之故國語云戎狄貪而不讓坐諸門外而體委與之是也若夷狄君來則當與中國子男同故

小行人職掌大賓小容所陳牲牢當不異也四是饗宿衛及耆老孤子則以醉為度故酒正云凡饗士庶子饗耆老孤子皆共其酒無酌數鄭云要以醉為度食禮者有飯有穀雖設酒而不飲其禮亦以飯為主故曰食也其禮亦有二種一是禮食故大行人云諸公三食之禮有九舉及公食大夫禮之屬是也二是燕食謂臣下自與賓客旦夕共食案鄭注曲禮酒漿處右云此大夫士與賓客燕食之禮燕禮者凡正饗食在廟燕則在寢燕以示慈惠故也燕禮則折俎有酒而無飯其牲用狗毛詩傳云燕安也其禮最輕升堂行一獻禮畢而脫屣升堂坐飲以至醉也儀禮猶有諸侯燕禮一篇凡燕禮亦有二種一是燕同姓二是燕異姓故詩湛露鄭箋云夜飲之禮同姓則成庶姓諫之則止此宴饗食致仕之老則當用正饗正食正燕之禮以其有賢德不可以褻禮待之其饗死事之老不必有德又是老人不宜久立當用折俎之饗燕食之食老人不合夜飲當用異姓之燕

禮皇氏云春夏雖以飲為主亦有食先行饗次燕次食
秋冬雖以食為主亦有饗先行食次燕次饗一日之中
三事行畢
義或然也

劉氏曰以養莫善於燕莫不善於饗而食次之以養
亦莫善於饗莫不善於食而燕次之周人備矣所謂
養老者養其體者也故擇其柔嘉選其馨香潔其酒
醴品其豆籩脩其簋籩奉其犧象謹其祓除於是乎
體解節折而共飲食之又為折俎加豆是以惠豐而
德洽民之見者以為盡心也莫不加愛焉故莫善於
燕夫饗所以訓恭儉也而養老所以充體氣也脩具
物篤其意而不得躬之酒盈而不飲肉乾而不食設
几而不倚一獻而百拜惡在其惠也故莫不善於享
是有虞氏所以不從也所謂養義養其賢者也年者
天下之達尊也爵者天下之達尊也以達尊之爵養
達尊之年其意猶不敢褻為之故一獻而百拜民之

見者以為至恭也莫不加肅焉故莫善於饗夫養義者貴其養志也若曾子之養曾皙者也而食者無百拜之恭無一獻之節此所謂養口體也若曾元之養曾子者也民之見者可易也故曰莫不善於食是夏后氏所以不從也三聖之作非以相反也養老以彼養義以此所以尊其年尚其德也尊其年仁也尚其德義也周人通其道達其意脩而兼用之仁且義是謂大備矣

陳氏禮書行葦言飲射而繼之以祈黃者此周人以燕禮養老也周官外饗言饗者老此周人以饗禮養老也祭義曰食三老五更於大學天子袒而割牲執醬而饋執爵而酌此周人以食禮養老也

月令養衰老行糜粥飲食

注助老氣也
行猶賜也

內則淳熬煎醢加於陸稻上沃之以膏曰淳熬

注淳沃也熬亦

煎也沃煎成之以為名

疏陸稻謂陸地之稻也謂以

陸地稻米熟之為飯煎醢使熬加於飯上恐其味薄更

沃之以膏使

味相湛漬 淳母煎醢加於黍食上沃之以膏曰淳母

注母讀曰模模象也作此象淳熬

疏法象淳熬而為

之但用黍為異耳黍不言陸者黍皆在陸無在水之嫌

炮取豚若將剗之剗之實巢於其腹中編萑以苴之塗

之以謹塗炮之塗皆乾擘之濯手以摩之去其皸為稻

粉糝溲之以為酏以付豚煎諸膏膏必滅之鉅鑊湯以

小鼎鄉脯於其中使其湯毋滅鼎三日三夜毋絕火而

後調之以醯醢

注炮者以塗燒之為名也將當為牂牁也到劉博異語也謹當為堽聲之

誤也堽塗塗有穠草也獸謂皮肉之上醢莫也糝澁亦博異語也糝讀與滫澁之滫同鄉脯謂煮豚若羊於小

鼎中使之香美也謂之脯者既去獸則解析其肉使薄如為脯然唯豚全耳豚羊入鼎三日乃內醯醢可食也

疏炮取豚若將者言為炮之法或取豚或取牂剗剗其腹實香棗於其腹中荏亂草也苴裹也編連亂草以

裹而豚牂也塗之以謹塗者以此堽塗而泥塗之擘以者謂擘去乾塗也手既擘泥不淨其肉入熱故濯手摩

之去其獸莫為稻粉糝澁之以為醢者付全豚之外煎之於膏若羊則解析肉以粥和之滅沒也小鼎盛膏以

膏煎豚牂膏必沒此豚牂也鉅鑊湯以小鼎鄉脯其中者謂以大鑊盛湯以小鼎之香脯實於大鑊湯中使其

湯母減鼎者使鑊中之湯母得沒此小鼎若湯減鼎恐湯入鼎中令食壞也母絕火者欲令用火微熟勢不絕

注云惟豚全耳者案周禮封人有毛炮之豚豚形既小故知全體

擣珍取牛羊麋鹿麇

之肉必胔每物與牛若一捶反側之去其餌孰出之去

其馘彘其肉

注胔脊側肉也捶擣之也餌筋腓也彘之為汁和也汁和亦醢醢與疏脊側肉美擣

以為珍宜取美處故為脊側肉腓即筋之類上炮豚炮

詳調以醢醢下漬亦食之以醢若醢故知擣珍和亦用

醢醢漬取牛肉必新殺者薄切之必絕其理湛諸美酒期

朝而食之以醢若醢醢

注湛亦漬也

為熬捶之去其馘編萑布

牛肉焉屑桂與薑以洒諸上而鹽之乾而食之施羊亦

如之施麋施鹿施麇皆如牛羊欲濡肉則釋而煎之以

醢欲乾肉則捶而食之

注熬於火上為之也今之火脯似矣欲濡欲乾人自由也醢或

為醢此七者周禮八珍其一肝膋是也

疏此論作熬

之法欲濡肉則釋而煎之以醢者欲得濡肉則以水潤

釋之而煎之以醢也注云七者謂第一淳熬也第二淳

模也第三第四炮取豚若祥也第五擣珍也第六漬也

第七熬也云其一肝膋者則此糝下肝膋

也但作記之人文不依次故在糝下陳之 糝取牛羊豕

之肉三如一小切之與稻米稻米二肉一合以為餌煎

之

注此周禮糝食也三如一者謂取牛羊豕之肉等

分如一稻米二肉一者謂二分稻米一分肉也 肝

膋取狗肝一臠之以其膋濡炙之舉燠其膋不羶

注膋腸間

脂舉或為巨疏舉皆也謂炙腎皆焦也取稻米舉糝溲之小切狼臙膏以

與稻米為醢注狼臙膏臙中膏也以此煎稻米則似今膏

論養老須飲食如養親之事明八珍之饌并明羞豆糝餐之等

朱子曰此即所謂養老之珍也

大夫七十而有閣注有秩膳也閣以板為之度食物也

王制五十異糧六十宿肉七十貳膳八十常珍九十飲

食不離寢膳飲從於遊可也注糧糧也貳副也遊謂出入止觀疏五十始衰糧

宜自異不可與少壯者同也六十轉老故恒宿肉在帳下不使求而不得也七十恒令善食有儲副不使有闕

也八十珍竒飲食尋常使有九十飲食無時或急求須得故不離於寢笑善之膳水漿之飲從於所遊之處可也

吳氏澄曰此當兼國老庶老而言見古人之養老年愈衰而養愈厚意每十年一變者以人之精神氣力涉世十年則天道一週而衰態不能不異於前爾

詩幽風七月為此春酒以介眉壽

傳春酒凍醪也眉壽豪眉也箋介助也

獲稻釀酒助其養老之具

大雅行葦曾孫維主酒醴維醕酌以大斗以祈黃耆祈

告也成王有醇厚之酒醴以大斗酌而嘗之而美故以告黃耆之人徵而養之也疏鄭以此章始告老人下

章乃言其養言養老之禮亦當豫告老人矣

黃者台背以引以翼

箋台之言也

則背有鮒文既告老人及其來也以禮引之以禮翼之在前曰引在旁曰翼

壽考維祺以介

景福

箋養老人而得吉所以助大福也

蕙田案以上酒食

禮記王制五十養於鄉六十養於國七十養於學達於諸侯八十拜君命一坐再至瞽亦如之九十使人受天

注子諸侯養老同也國國中小學在王宮之左學大學也在郊小學在國中大學在郊此殷制明矣命謂君不親饗食必以其禮致之疏五十始哀故養於鄉學六十漸哀養禮彌厚故養於國中之小學七十大哀養禮轉

重故養於大學此養老之事非唯天子之法乃通達於諸侯也至於年八十衰弱不堪來學受養君以饗食之禮使人就家致之其受君命之時理須再拜不堪為勞一坐於地而首再至於地也瞽人無目恐其傾倒拜君

命亦當如此

文王世子天子視學大昕鼓徵所以警衆也衆至然後

天子至乃命有司行事興秩節祭先師先聖焉

疏此論天子視

學必遂養老之法則養老既畢乃命諸侯羣吏令養老之事

有司卒事反命始之養

也注告祭畢也祭畢天子乃入又之養老之處凡大合樂必遂養老是以往焉言始始立學也疏天子視

學在虞庠之中有司釋奠既畢天子乃從虞庠入反於國明日乃之東序而養老故云始之養也注云言始始

立學也者為下釋奠于先老之學故云始立學也若非始立學之後則視學凡養老於東膠不釋奠于先老也

陳氏禮書記言天子視學遂適東序養老則視學養

老皆同日也鄭氏謂用其明日誤

胡氏銍曰始初也之往也謂反命乃往養老之處鄭謂始立學非

適東序釋奠於先老遂設三老五更羣老之席位焉養

老東序則是視學於上庠三老五更各一人也皆年老更事致仕者也天子以父兄養之示天下之孝悌也名以三五者取象三辰五星天所因以照明天下者羣老無數其禮亡以鄉飲酒禮言之席位之處則三老如賓

五更如介羣老如衆賓必也 疏三老五更各一人蔡邕以為更字為叟叟老稱又以三老為三人五更為五人非鄭義也知天子以父兄養之者以天子冕而總干執醬而饋是父兄事也云三老如賓五更如介者案鄉飲酒注敷席賓席牖前南面介席西階上東面是也云羣老如衆賓者案鄉飲酒注席衆賓於賓之西南面各持焉是也

白虎通德論享三老五更於太學者所以教諸侯悌也不正言父兄言老更者何老者壽考也欲言所令者多也更者更也所更歷者衆也即如是不但言老言三何也欲言其明於天地人之道而老也五更者

欲言其明於五行之道而更事也三老五更幾人乎
曰各一人何以知之既以父事父一而已不宜有三
應劭漢官儀三老五更三代所尊也安車輦輪送迎
至家天子獨拜於屏三者道成於天地人老者久也
舊也五者訓於五品更者五世長子更更相代言其
能以善道改更已也三老五更皆取有首妻男女完
具

陳氏禮書古者建國必立三卿鄉飲酒必立三賓而
養老必立三老禮曰三公在朝三老在學三公非一

人則三老五更非各一人矣漢志以德行年高老者一人為老次一人為更故永平中拜桓榮為五更建初中拜伏恭為三老而鄭氏以此為三代之制誤矣

蕙田案三老五更鄭氏及白虎通漢官儀俱以為各一人惟蔡邕云三老三人五更五人而陳祥道亦宗之然記稱天子之養老更袒而割牲親執醬執爵其禮甚尊非尋常之老可以當之說者謂三老選三公之老者五更選卿大夫之老者公卿大夫其人數不多未

必齒德俱尊者一時頓有八人也白虎通云
父一而已不宜有三其說簡而明矣

觀承案古禮已亡漢志謂三老五更止各一
人亦据漢禮言之耳則蔡邕謂三老三入五
更五人者亦不可厚非也如三公九卿之類
皆以數稱而實人如其數豈可以一人為三
老一人為五更乎但三公不必備惟其人則
三老五更亦不必備有則全之無則以一人

兼之亦無不可也且所謂父事者非父也父
惟一而父事之者何妨有三即如白虎通之
論亦思王者父事三老兄事五更則父不可
以三兄獨不可以有五乎此言固未為全是
當並存之耳

應氏鏞曰東序夏后氏之學名也此所云序則未必
自為一學也即學宮之東序焉爾始立學者既釋菜
而退饋於東序諸侯學校之東序也天子亦始立學
視學興秩節而始適東序天子學校之東序也鄭氏
於此二者皆以為自上庠而適東序上庠在郊而東
膠在國若自郊反國則驅馳甚矣以此約度之則東

序亦在學中而已樂記祭義皆謂食三老五更於大學則天子之所視者即太學也大學之東序者蓋地道尊右神祀尚陰故宗廟之位皆以西為上竊意夫西者廟宮之所存所以尊先聖先師也東者黌舍之所寓所以處國子俊選也今學宮亦然故立學釋菜則退儼於此而行一獻之義視學卒事則設位於此而修教養之禮而者皆曰退儼曰退修蓋以廟宮為尊故以黌舍為退猶朝廷之進見而曰退也

適饌省醴養老之珍具遂發咏焉退修之以孝養也注

視其所有發咏謂以樂納之退修之謂既進而入獻之以禮獻畢而樂闋疏布席既畢天子親適陳饌之處省視醴酒并省視養老之珍具省具既畢出迎三老五更將入門之時遂作樂聲發其歌咏以樂納之也三老

五更入而即位於西階下天子乃退酌醴獻之以修行
孝養之道也案大射賓入及庭奏肆夏此養老既尊故
用兩君敵禮入門即奏肆夏故仲尼燕居曰入門而縣興是也
反登歌清廟既歌而語

以成之也言父子君臣長幼之道合德音之致禮之大

者也

注反謂獻羣老畢皆升就席也反就席乃席工於西階上歌清廟以樂之既歌謂樂正告正歌備也

歌備而旅旅而說父子君臣長幼之道諸合樂之所美
以成其意鄉射記曰古者於旅也語疏三老五更羣

老初受獻畢皆立於西階下東面今皆反升就席乃使
工登堂上西階北面歌清廟之詩以樂之既歌之後則

至旅酬之節說善道以成就天子養老之義也德音
謂歌清廟之詩文王道德之音致謂致極也言說父子

君臣長幼之道理會合清廟文王道德音聲理之至極
也案鄉飲酒之禮告正歌備後作相為司正賓取解酬

主人主人酬衆賓是歌備而旅酬也旅酬之時則語說

下管象舞大武大合衆以

事達有神興有德也

注象周武王伐紂之樂也以管攝其聲又為之舞皆於堂下衆所謂

合學士也達有神明天授命周家之有神也興有德美天王武王有德師樂為用前歌後舞

疏登歌之後笙入立於堂下管中奏此象武之曲庭中舞此大武之舞大武即象也變文耳興謂發起注云師樂為用前歌後

舞者今文泰誓之文

正君臣之位貴賤之等焉而上下之義行矣

疏登歌清廟文王詩也君詩在上下管象是武王詩臣詩在下是止君臣之位貴賤之等也既以此教上下衆

知之是上下之義行於衆庶也

有司告以樂闋

注此所告者謂無算樂疏闋終也謂養老之

末無算樂之終也以上云登歌清廟次下管象此云告以樂闋下即云王乃命諸侯是燕末之事故知樂闋為

無算樂也

王乃命公侯伯子男及羣吏曰及養老幼於東序

終之以仁也

注羣吏鄉遂之官王於燕之末而令諸侯時朝會在此者各反養老如此禮是終其

仁心

疏王家恒自養老是仁恩也又令諸侯州里而行養老是終之以仁謂仁恩之心也諸侯既為畿外故

知羣吏為畿內鄉遂之官也

陳氏曰前言養老不及幼及命諸侯羣吏則兼幼言之者耆老孤子先王未嘗不兼養然其所重特老者

而已

是故聖人之記事也慮之以大

疏此節是申說視學養老之義記事謂聖人親

行養老之禮記序前代之事也慮謀也大謂孝弟也言謀慮於養老之事是本於孝弟故也

愛之以

敬

疏適饌省醴是受而又敬之也

行之以禮

疏迎之如見父兄之禮也

脩之以孝養

疏親獻醴薦饌是脩於孝養故也

紀之以義

疏既歌而語是紀錄德音之義亦存天下之大義也

終之以仁

疏命諸侯令歸國各行此禮是終之以仁心也

是故古之人一舉事

而衆皆知其德之備也古之君子舉大事必慎其終始

而衆安得不喻焉

疏此節覆說養老而在下衆庶知道德之備其在學乎一舉事而衆皆知

其德之備者上慮之以大之屬是也大事謂養老初則慮之以大是慎其始末則終之以仁是慎其終既慎其

本末終始一一露見盡以示衆庶而衆何得不曉喻焉說命曰念終始典於學注

常也念事之終始常

于學學禮義之府

意田案此經明養老之節文最為詳盡

樂記食三老五更於太學天子袒而割牲執醬而饋執

爵而酌冕而總干所以教諸侯之弟也

注三老五更互言耳皆老人更

知三德五事者也冕而總干親在舞位也周名太學曰東膠疏此冕當驚冕享先公以饗射養老之類

祭義食三老五更於太學天子袒而割牲執醬而饋執

爵而酌冕而總干所以教諸侯之弟也是故鄉里有齒

而老窮不遺強不犯弱衆不暴寡此由太學來者也注割

牲制俎實也酌食罷飲也冕而總干親在舞位以樂侑食也教諸侯之弟次事親疏以天子敬老鄉里化之

故有齒老而被養故在下半年老及困窮者皆化上而養之故不見遺棄以老弱被尊養人皆化上故強不犯弱衆不暴寡

方氏曰由大學來者言教化之原出自大學也

內則凡養老五帝憲

注憲法也養之法其德行

三王有乞言

注有善為

法又從之求善言以施行也

五帝憲養氣體而不乞言有善則記之

為惇史三王亦憲既養老而後乞言亦微其禮皆有惇

史

注惇史史之惇厚者也微其禮者依違言之求而不切也 疏此一節論五帝三王養老之禮五帝養老

法其德行三王其德漸薄非徒法其德行又從求乞善言五帝奉養老人氣息身體恐其勞動故不乞言老人

有善則記錄之使衆人法則為惇厚之史三王既法德行入從乞言乞言之禮亦依違求之而不偏切三代皆法其德行善言為惇厚之史

吳氏澄曰三王乞言之禮亦微而不顯露謂從容乘間俟可問而後問三代皆如五帝時有惇史以記其所乞之言也

呂氏祖謙曰年之貴于天下久矣五帝三王皆尊德尚齒然五帝三王養老之禮雖同憲與乞言不同蓋道有升降風氣有厚薄所以如此五帝憲則是瞻儀容視起居不曾有乞言之禮蓋當時風氣未開人情淳厚朝夕與老者親炙其仁義之密道德之光自得于觀感不言之際三王不及五帝所以有乞言之禮比之於觀瞻不言之中氣味稍薄

天王世子凡祭與養老乞言合語之禮皆小樂正詔之於東序大樂正學舞干戚語說命乞言皆大樂正授數詩大雅行葦序行葦忠厚也周家忠厚仁及草木故能內睦九族外尊事黃耆養老乞言以成其福祿焉

變乞從求

善言可以為政者敦史受之 疏禮有內外小史大史無惇史正以待接老人擇史之惇厚者掌之惇非官名也故彼注云惇史史之惇厚者也

孝經鉤命決 天子臨辟雍視割牲以尊三老

五經通義 天子臨辟雍者何所以行禮樂宣教化教

導天下之人使為士君子養三老事五更與諸侯行禮之處也

董氏文驥曰周人養老兼饗食燕之禮一日而相因天子袒而割牲蓋用饗禮之體薦以為折俎之實也執醬而饋執爵而酌蓋用食禮之正飯加飯正饌庶羞所謂設饌也酒正供酒無酌數蓋用燕禮一獻立而舉旅行酬脫屣安坐而無算爵以醉為度共賓客飲之外復先設醴齊所謂省醴也陳氏云設席位非

立飲則食當於西階下反升就席之後饋食以醬食
禮公親設醬也食畢以酒酌口食禮酌用漿而此用
酒且酒與醬皆親執之蓋燕禮宰夫為主人此醬酒
既親執則天子必自為主人優老也正饌之俎當兼
三牲不必用狗伐木之詩有肥牡肥羜先儒謂天子
燕禮本當不同於諸侯加饌之差當無過三十豆而
所謂珍具者如羅氏共鳩及內則八珍之類燕禮旅
酬卿大夫而後升歌堂上笙間堂下鄉飲酒禮則歌

備而旅酬此亦登歌清廟下管象而後於旅也語所謂惇史乞言也聲莫重於登歌堂上之歌必有琴瑟節之文不具也燕禮或升歌鹿鳴下管新宮遂合鄉樂舞勺陳氏云舞在諸樂之後所謂冕而就舞位朱干玉戚舞大武蓋舞莫重於武宿夜也注謂以樂侑食天子諸侯每飯有侑食之樂而他食禮則無樂然樂師饗食奏鼓鐘鐘師饗食奏燕樂籥師賓客饗食鼓羽籥之舞陳氏謂食亦有樂則此割牲饋食時豈

先有樂舞以侑食而旅酬無算爵之後又樂舞無算以侑酒猶納賓用樂而旅復用樂與象舞執籥以舞不在六樂之列習之成童用之祈禱此但以管奏其詩非舞其籥也管并兩竹笙巢於匏管重於笙大射祭享用之燕不當用而此用之優老也賓入門發咏而奏肆夏天子所以享元侯兩君相見不歌文王而歌清廟為二王後諸侯之長今俱用之優老也舞者動其容而曲隨之堂下舞六代之舞則堂上亦歌賚

桓勺之詩為樂歌以節之也禮既兼用饗食燕則饗有酬幣食有侑幣燕有好貨則亦有酬幣禮文不具也禮文散見於王制文王世子樂記祭義內則但各舉綱目不能貫串始末故集其略如此

蕙田案以上視學養老行事之禮節

禮記王制凡三王養老皆引年

注已而引戶校年當行復除也老人衆多非賢

者不可皆養

五十始衰六十非肉不飽七十非帛不煖八十非人不

煖九十雖得人不煖矣

注煖
溫也

方氏懋曰三十曰壯四十曰強壯強則盛極矣人盛之極則趨於衰而已故五十為始衰之年自此以往宜有以扶其衰九十雖得人不煖則以衰之極養之宜無不至故也

孟子五畝之宅樹之以桑五十者可以衣帛矣雞豚狗彘之畜無失其時七十者可以食肉矣百畝之田勿奪其時數口之家可以無飢矣謹庠序之教申之以孝弟

之義頽白者不負戴于道路矣七十者衣帛食肉黎民不飢不寒然而不王者未之有也

五畝之宅樹墻下以桑匹婦蠶之則老者足以衣帛矣

五母雞二母彘無失其時老者足以無失肉矣百畝之

田匹夫耕之八口之家可以無飢矣

注五雞二彘八口之家畜之足以為

畜產之本也

所謂西伯善養老者制其田里教之樹畜導其妻子使養其老五十非帛不煖七十非肉不飽不煖不飽謂之

凍餒文王之民無凍餒之老者此之謂也

注所謂無凍餒者教導之

使可以養老者耳非家賜而人益之也

徐氏乾學曰孟子言五十可以衣帛七十可以食肉與王制不同王制言養血氣以食為先衣為次孟子言王政之序足衣而後足食夫王者之養老扶其衰而適其體尚如此其周備矣則為人子者事父母之年日衰一日則所以盡心於奉養者可不日慎一日乎

蕙田案以上教民養老之法

右養老之禮

禮記曲禮五十曰艾服官政六十曰耆指使七十曰老

而傳八十九曰耄百年曰頤

王制五十而爵六十不親學七十致政惟哀麻為喪

蕙田案此二條服官致政之期

曲禮大夫七十而致事

注致其所掌之事於君而告老
疏白虎通云臣年七十懸車

致仕者臣以執事趨走為職七十耳目不聰明是以退老
去避賢也所以長廉遠恥君不使退而自去者尊賢也

若不得謝

注謝猶聽也君必有命勞苦辭
謝之其有德尚壯則不聽耳

則必賜之几

杖行役以婦人適四方乘安車自稱曰老夫

注几杖婦人安車所

以養其身體也安車坐乘若今小車也老夫老人稱也
亦明君尊賢春秋傳曰老夫耄矣疏既不聽致事則

祭義云七十杖于朝是也聽致事則王制云七十杖于國八十杖于朝是也養老之具在國及出皆得用之今言行役婦人四方安車則相互也從語便故離言之耳庚蔚云漢世駕一馬而坐乘也熊氏云案書傳略說云致仕者以朝乘車輜輪鄭云於其國則稱名注君雖尊乘車安車言輜輪明其小也異之自稱

猶若臣

疏於其

越國而問焉必告之以其制

注鄰國來問必

國謂自與其君言問於老者以答之制法度疏若他國來問國君之政君雖已達其事猶宜問于老賢老賢則稱國之舊制以對也國之問也

祭義是故朝廷同爵則尚齒七十杖於朝君問則席八

十不俟朝君問則就之而弟達乎朝廷矣

注同爵尚齒老者在上也

君問則席為之布席于堂上而與之言凡朝位于廷不俟朝君揖之即退不待朝事畢也就之就其家也老而致仕君或不許異其禮而已
疏言敬老之道通達于朝廷

蕙田案此二條據大夫年老未許致仕者

王制九十者天子欲有問焉則就其室以珍從注尊養之

七十不俟朝注大夫士之老者君揖則退 八十月告存注每月致膳 九十

日有秩注秩常也有常膳疏此謂大夫士老年而聽致事者朝君之時入門至朝位君出揖之即退

不待朝事畢也告謂問也八十者君每月使人致膳告問存否九十年老方極君則日使人以常膳致之

七十者不有大故不入朝若有大故而入君必與之揖

讓而后及爵者

注謂致仕在家者其入朝君先與之為禮而后揖卿大夫士

憲田案此三條據大夫士已致仕者

王制歲二月東巡狩至于岱宗問百年者就見之

祭義天子巡狩諸侯待于竟天子先見百年者

注問其國君以

百年者所在而往見之
疏巡守謂巡行守土諸侯

八十九者東行西行者弗敢過西行東行者弗敢過

欲言政者君就之可也

注弗敢過者謂道經之則見之

徐氏乾學曰此節注疏皆云八十九者若天子諸侯因其行次或東行西行至其閭里之旁不敢過越

而去必往見之若論政雖不當道路左右君即就之可也愚謂耆老之人多矣君之所過安得一一而見之此言八十九十者東行則人之西行者不敢分道而過言必避之其西也亦然所以尊年而避道也朱子經傳通解亦採此意觀後欲言政者君就之則此屬泛指矣

憲田案此二條巡狩優禮老者

王制五十不從力政六十不與服戎七十不與賓客之

事八十齋喪之事弗及也

注五十力稍衰也力政城道之役與及也八十不齋則不

祭也子代之祭是謂宗子不孤疏五十不從力政唯據庶人力政謂築城治道其大夫士六十未致仕若為軍將當與服戎故知此據庶人也古周禮說國中自七尺以及六十野自六尺以及六十有五皆征之者使為

胥徒給公家之事如今之正衛耳力政田役為重故五十免之此五十不從力政祭義云五十不為甸徒也戎事差輕六十不與戎服又孟氏說六十還兵事也胥徒又輕故野外六十五猶征之若四郊之內以其多役胥徒之事六十則免

馬氏曰力政服戎此免於公者也賓客齊喪此免於私者也蓋代之以子孫矣

八十者一子不從政九十者其家不從政廢疾非人不

養者一人不從政

注廢廢於人事

祭義古之道五十不為甸徒頒禽隆諸長者而弟達乎

獲狩矣

注四井為邑四邑為丘四丘為甸甸六十四井也以為軍田出役之法五十始衰不從力役之

事頒之言分也。隆猶多也。及田者分禽多其老者謂竭
作未五十者春獵為搜冬獵為狩。疏作記之人在于
周末時力役煩重道周初之事故云古之道凡起徒役
無過家一人唯田與追胥竭作此未五十者猶任田役
故頒禽之時
多此長者

周禮地官鄉大夫以歲時登其夫家之衆寡辨其可任

者國中老者皆舍

注舍者謂有復除舍不收役事也
老者若今八九十復羨卒也

蕙田案此三條田役優老

禮記祭義壹命齒于鄉里再命齒于族三命不齒族有

七十者弗敢先

注此謂鄉射
飲酒時也

居鄉以齒而老窮不遺強不犯弱衆不暴寡而弟達乎
州巷矣

憲田案此二條鄉黨優老

王制父之齒隨行兄之齒雁行朋友不相踰輕任并重
任分斑白者不提挈

祭義行肩而不併不錯則隨見老者則車徒辟斑白者
不以其任行乎道路而弟達乎道路矣

憲田案此二條道路優老

曲禮八十九曰耄七年曰悼悼與耄雖有罪不加刑焉

周禮秋官司厲凡有爵者與七十者與未齒者皆不為奴

蕙田案此二條刑罰優老

孔子家語正論解哀公問于孔子曰二三大夫皆勸寡人使隆敬于高年何也孔子對曰君之及此言將天下實賴之宜惟魯哉公曰何也其義可得聞乎孔

子曰昔者有虞氏貴德而尚齒夏后氏貴爵而尚齒
殷人貴富而尚齒周人貴親而尚齒虞夏殷周天下
之盛王也未有遺高年者焉年之貴于天下久矣次
于事親是故朝廷同爵而尚齒七十杖于朝君問則
席八十則不仕朝君問則就之而悌達乎朝廷矣其
行也肩而不並不錯則隨斑白者不以其任于道路
而悌達乎道路矣居鄉以齒而老窮不置強不犯弱
衆不暴寡而悌達乎州巷矣古之道五十不為甸役

須禽隆之長者而悌達乎蒐狩矣軍旅什伍同爵則尚齒而悌達乎軍旅矣夫聖王之教孝悌發諸朝廷行于道路至于州巷放于蒐狩循于軍旅則衆感以義死而弗敢犯公曰善哉寡人雖聞之弗能成

尚書大傳齊宣王問于子春曰寡人欲行孝弟之義為之有道乎子春曰昔者衛聞之樂正子曰文王之治岐也五十者杖于家六十者杖于鄉七十者杖于國見君揖杖八十者杖于朝見君揖杖君曰趣見容

無俟朝以朝乘車輦輪御為僕送至于家而孝弟之
義達于諸侯九十杖而朝見君建杖君曰趣見母侯
朝以朝車送之舍卜筮巫醫御于前祝噓祝哽以食
乘車輦輪胥與就膳徹送至于家君如有欲問明日
就其室以珍從而孝弟之義達于四海

右優老之事

五禮通考卷一百七十六

欽定四庫全書

五禮通考卷一百七十七

刑部尚書秦憲田撰

嘉禮五十

學禮

續漢書禮儀志永平二年三月上始帥羣臣養三老五
更于辟雍先吉日司徒上太傅若講師故三公人名用
其德行年耆高者一人為老次一人為更皆服都紵大

袍單衣卓緣領袖中衣冠進賢扶玉杖五更亦如之不
杖皆齋于太學講堂其日乘輿先到辟雍禮殿御座東
廂遣使者安車迎三老五更天子迎于門屏交禮道自
阼階三老升自賓階至階天子揖如禮三老升東面三
公設几九卿正履天子親袒割牲執醬而饋執爵而酢
祝鯁在前祝饁在後五更南面公進供禮亦如之明日
皆詣闕謝恩以見禮遇大尊顯故也

後漢書明帝本紀永平二年冬十月壬子幸辟雍初行

養老禮詔曰光武皇帝建三朝之禮而未臨享眇眇小子屬當聖業間暮春吉辰初行大射令月元旦復踐辟雍尊事三老兄事五更安車輦輪供綏執授侯王設醬公卿饌珍朕親袒割執爵而酌祝哽在前祝咽在後升歌鹿鳴下管新宮八佾具修萬舞于庭朕固薄德何以克當易陳負乘詩刺彼已永念慙疚無忘厥心三老孺躬年耆學明五更桓榮授朕尚書詩曰無德不報無言不酬其賜榮爵關內侯食邑五千戶三老五更皆以二

千石祿養終厥身其賜天下三老酒人一石肉四十斤
有司其存者耄恤幼孤惠鰥寡稱朕意焉

八年十月丙子臨辟雍養三老五更

文獻通考安帝以魯丕為三老又以李充為三老楊統
位至光祿大夫為國三老靈帝以袁逢為三老賜以玉杖
譙周五經然否論漢中興定禮儀羣臣欲令三老答
天子拜城門校尉董鈞駁曰養三老所以教事父之
道也若答拜是使天下答子拜也詔從鈞議譙周論

之曰禮尸服上服猶以非親之故答子拜士見異國
君亦答拜是皆不得視猶子也

虞氏喜曰且據漢儀於門屏交禮交禮即答拜中興
謬從鈞議後革之深得其意

馬氏端臨曰案古人養老之禮有養于鄉者所謂五
十養于鄉王命公侯伯子男及羣吏曰反養老于東
序大司徒以保息六養萬民二曰養老是也有養於
國者天子視學設三老五更羣老之席位執醬親饋
執爵親醕是也漢初每鄉及縣皆有三老歲首則使
人存問賜以束帛酒肉或賜以爵乃古人養于鄉之
意而國學養老天子親講之禮則至東漢始
行之然東漢亦時有下郡縣存問養老之詔

魏志高貴鄉公本紀甘露三年秋八月丙寅詔曰夫養老興教三代所以樹風化垂不朽也必有三老五更以崇至敬之言納誨著在惇史然後六合承流下觀而化宜妙簡德行以充其選關內侯王祥履仁秉義雅志淳固關內侯鄭小同溫恭孝友師禮不忒其以祥為三老小同為五更車駕親率羣司躬行古禮焉

通典甘露二年天子親帥羣司行養老之禮于太學命王祥為三老鄭小同為五更王祥南面几杖以師

道自居天子北面乞言祥陳明王聖帝君臣政化之
要以訓之聞者莫不砥勵

魏書孝文帝本紀太和十五年八月壬辰議養老十六
年八月己酉以尉元為三老游明根為五更又養國老
庶老

冊府元龜太和十六年八月詔曰夫大道凝虛至德
冲挹故後王法嘉猷以鄉世聖人崇謙光而隆美是
以天子父事三老兄事五更所以順孝悌于萬國垂

教本于天下自非道高識博孰能處之是以五帝憲
德三王乞言若求備一人同之古哲叔世之老孰能
克堪師上聖則難為其舉傳中庸則易為選朕既庸
寡德謝曩哲老更之選差可有之前司徒山陽郡公
尉元前大鴻臚卿新太伯游明根並元亨利貞明允
誠素少著英風老敷雅迹位顯台宿終歸私第可謂
知始知卒希世之賢也公以八十之年宜處三老之
重卿以七十之齡可充五更之選于是養三老五更

于明堂國老庶老于階下帝再拜三老親袒割牲執
爵而饋于五更行肅拜之禮賜國老庶老衣服有差
既而元言曰自天地分判五行施用人之所崇莫重
於孝順然五孝六順天地之所先願陛下重之以化
四方臣既年衰不究遠趣心耳所及敢不盡誠帝曰
孝順之道天地之經今承三老明言銘之于懷明根
曰夫至孝通靈至順感幽孝順之道無所不格願陛
下念之以濟黎庶臣年志朽弊識見闇昧然在心之

慮不敢不盡帝曰五更助三老以言至範敷展德音
當克已復禮以尊所授禮畢乃賜步輦一乘詔曰夫
尊老尚更列聖同致欽年敬德綿哲齊軌朕雖道謝
玄風識昧睿知然仰稟先誨全遵猷旨故推老以德
立更以言父焉斯彰兄焉斯顯矣前司徒公元前鴻
臚卿明根並以充德懸車懿量歸老故尊老以三事
更以五雖老更非官耄耄罔祿然稟事既高宜加殊
養三老可給上公之祿五更可食元卿之俸供養之

味亦同其列其後車駕幸鄴明根朝于行宮詔曰游
五更養素蓬簷歸于衡里可謂朝之舊德國之老臣
可賜帛五百匹穀五百斛勅太官備送珍羞後車駕
幸鄴又朝行宮賜穀帛如前為造甲第國有大事常
璽書訪之

隋書禮儀志齊制仲春令辰陳養老禮先一日三老五
更齊於國學皇帝進賢冠玄紗袍至辟雍入總章堂列
宮懸王公以下及國老庶老各定位司徒以羽儀武賁

安車迎三老五更于國學並進賢冠元服黑烏素帶國
子生黑介憤青衿單衣乘馬從以至皇帝釋劍執珽迎
于門內三老至門五更去門十步皆降車以入皇帝拜
三老五更攝齋答拜皇帝揖進三老在前五更在後升
自右階就筵三老坐五更立皇帝升堂北面公卿升自
左階北面三公授几杖卿正履國老庶老各就位皇帝
拜三老羣臣皆拜不拜五更乃坐皇帝西向肅拜五更
進珍羞酒食親袒割牲執醬以饋執爵而酌以次進五

更又設酒醑於國老庶老皇帝升御座三老乃論五孝
六順典訓大綱皇帝虛躬請授禮畢而還

周書武帝本紀保定三年四月戊午幸太學以太傅燕
國公于謹為三老而問道焉

于謹傳保定三年四月詔曰樹以元首主乎教化率
民孝悌置之仁壽是以古先明后咸若斯典立三老
五更躬自袒割朕以眇身處茲南面何敢遺此黃髮
不加尊敬太傅燕國公謹執德淳固為國元老饋以

乞言朝野所屬可為三老有司具禮擇日以闕謹上
表固辭詔答不許又賜延年杖高祖幸太學以食之
三老入門皇帝迎拜門屏之間三老答拜有司設三
老席于中楹南向太師晉國公護升階設几于席三
老升席南面憑几而坐以師道自居大司馬楚國公
寧升階正鳥皇帝升階立于斧扆之前西面有司進
饌皇帝跪設醬豆親自袒割三老食訖皇帝又親跪
授爵以酌有司撤訖皇帝北面立而訪道三老乃起

立于席後皇帝曰猥當天下重任自惟不才不知政
治之要公其誨之三老答曰木受繩則正后從諫則
聖自古明王聖主皆虛心納諫以知得失天下乃安
唯陛下念之又曰為國之本在乎忠信是以古人云
去食去兵信不可失國家興廢莫不由之願陛下守
而勿失又曰治國之道必須有法法者國之綱紀綱
紀不可不正所正在于賞罰若有功必賞有罪必罰
則有善者日益為惡者日止若有功不賞有罪不罰

則天下美惡不分下民無所措其手足矣又曰言行者立身之基言出行隨誠宜相顧願陛下三思而言九慮而行若不思不慮必有過失天子之過乃無大小如日月之蝕莫不知者願陛下慎之三老言畢皇帝再拜受之三老答拜焉禮成而出

唐開元禮皇帝養老于太學

陳設

前三日尚舍直長設大次于學堂之後隨地之宜設三

老五更次于學堂南門外之西羣老次于其後俱東向
設羣官次文官于門外之東重行西向武官于羣老之
西重行東向皆北上前一日尚舍奉御設御座于堂上
東序西向莞筵紛純加藻席畫純次席黼純設三老座
于西楹之東近北南向設五更座于西階上東向設國
老三人座于三老座西俱不屬焉皆莞筵紛純加藻席
畫純設衆座國老座于堂下西階之西東面北上皆蒲
筵緇布純加莞席縣帛純

若三品以上則莞筵紛純加藻席畫純凡五品以上致仕

者為設庶老座于國老之後皆蒲筵緇布純六品以下致仕者為

庶老太樂令展宮懸于學堂之庭設登歌于堂上及舉麾

位等皆准元會之儀典儀設文官五品以上位于懸東

六品以下在其南俱重行西向北上武官五品以上位

于懸西六品以下在其南當文官俱重行東向北上蕃

客分方位于文武官六品之南若有諸州使人分方位於文武官九品之後

學生分位于文武官之後奉禮設門外位如設次之式

尚舍奉御設罇于東楹之西北向左 酒有站以置爵

鑾駕出宮

如讀
令儀

養老

仲秋之月擇吉辰皇帝親養三老五更于太學所司先
奏定三師三公致仕者用其德行及年高者一人為三
老次一人為五更尚食先具牢饌鑾駕將至通事舍人
引先置之官皆就門外位學生俱青衿服入就位鑾駕
至太學門迴輅南向侍中跪奏請降俛伏興皇帝降輅
乘輿入大次繖扇侍衛如常通事舍人引文官五品以

上從駕之官皆就門外位太樂令帥工人二舞就位如
正會之禮通事舍人引羣官各使入就位轎駕出宮量
時刻遣使迎三老五更于其第三老五更俱服進賢冠
乘安車前後尊從如常禮其國老庶老則有司先戒之
轎駕既至太學三老五更及羣老等俱赴集其次羣老
各服其服太常少卿贊三老五更俱出次引立于學堂
南門外之西東面北上奉禮贊羣官出次引立于三老
五更之後太常博士引太常卿升立于學堂北戶之內

當戶北向侍中版奏外辨皇帝出戶侍衛如常

侍中負寶陪從

如殿中監進大珪皇帝執大珪博士引太常卿太常卿

引皇帝

每太常卿前導皆博士先引

協律郎跪俛伏舉麾太和之樂

作皇帝降迎三老于門內之東西面立待臣從立于皇

帝之後太常卿與博士退立于左皇帝立定樂止三老

五更皆杖各二人夾扶左右太常少卿引道敦史執筆

以從三老入門舒和之樂作三老五更立于門西東面

北上奉禮引羣官隨入立於其後初三老立定樂止太

常卿前奏請再拜退復位皇帝再拜三老五更去杖攝
齋以答再拜畢皇帝揖進三老在前五更從仍杖夾扶
入初至階皇帝揖升俱就座後揖立樂止侍衛之官量
人從升皇帝西面再拜三老三老南面答再拜皇帝西
面再拜五更五更答再拜休和之樂作三老五更俱坐
三公授几九卿正履訖殿中監尚食奏御進珍羞及黍
稷等皇帝省之遂設于三老前樂止太常卿引皇帝詣
三老座前執醬而饋訖太常卿引皇帝詣酒罇所取爵

侍中贊酌酒訖太常卿引皇帝進執爵而酌尚食奉御
以次進珍羞酒食于五更前國老庶老等皆坐及設酒
席于國老庶老前國老庶老等皆食皇帝即座太樂令
引工升奏韶和之樂三終三老乃論五孝六順典訓大
綱格言宣于上德音被于下皇帝乃虛躬請受敦史執
筆錄善言行事終二舞坐于懸中訖禮畢三老以下降
筵太常少卿及奉禮引導皆如初太常卿引皇帝從以
降階太和之樂作皇帝遂立于階前樂止三老五更

出舒和之樂作太常卿引皇帝立于階上三老五更
出門樂止侍中前奏禮畢退復位太常卿引皇帝降還
大次三老五更升安車導從而還通事舍人引羣官及
學生等以次出明日三老詣闕表謝

齋駕還宮

如讀
令儀

意田案唐書禮樂志亦同而文較略今不復

載

宋史禮志養老于太學皇帝服通天冠絳紗袍乘金輅

至太學酌獻文宣王三祭酒再拜歸御幄比車駕初出
量時刻遣使迎三老五更于其第三老五更俱服朝服
乘安車導從至太學就次國老庶老有司預戒之各服
朝服集于其次太樂正帥工人二舞入立於庭東上閣
門御史臺太常寺客省四方館自下分引百官宗室客
使學生等以次入就位如視學班太常博士贊三老五
更俱出次引國老庶老立于後重行異位禮直官通事
舍人引左輔奏請中嚴少頃又奏外辦皇帝出大次侍

衛如常儀大樂正令撞黃鍾之鐘右五鐘皆應協律郎
跪俛伏舉麾興宮架乾安之樂作皇帝即御座樂止典
儀曰再拜在位官皆再拜三老五更杖而入各左右二
人夾扶太常博士前引史臣執筆以從三老五更入門
宮架和安之樂作至宮架北北向立以東為上奉禮郎
引羣老隨入位于其後樂止博士揖進三老在前五更
在後仍杖夾扶宮架和安之樂作至西階下樂止博士
揖三老五更自西階陞堂國老庶老立于堂下三老五

更當御座揖羣老亦揖皇帝為興次奉禮郎揖國老升
堂博士引三老五更奉禮郎引國老以下各於席後立
典儀贊各就坐贊者承傳宮架尊安之樂作三老五更
就坐三公授几九卿正履訖殿中監尚食奉御進珍羞
及黍稷等先詣御座前進呈遂設于三老前樂止尚食
奉御詣三老座前執醬而饋訖尚醞奉御詣酒尊所取
爵酌酒奉御執爵奉於三老次太官良醞令以次進珍
羞酒食於五更羣老之前皆食大樂正引工人升登歌

奏息安之樂三終史臣既錄三老所論善言善行宮架
作申安之樂憲言成福之舞畢文舞退作受成告功之
舞畢三老以下降筵博士引三老五更於堂上當御座
前奉禮郎引羣老復位俱揖皇帝為興三老五更降階
至堂下宮架和安之樂作出門樂止禮直官通事舍人
引左輔前奏禮畢退復位典儀贊拜訖皇帝降座太常
卿導還大次百僚以次退車駕還宮三老五更升安車
導從還翼日詣闕表謝

王圻續通考世宗嘉靖中祭酒呂柟定視學養老儀注
惜不果行案柟據開元禮圖參定養老禮儀歲季春之
月擇吉日行養老禮於太學有司先奏定三師三少致
仕者用德行年高一人為三老次一人為五更三品上
下年德高邵者為羣老併開具致政之老與其孤姓名
事狀以聞前期三日設御幄于太學堂後設御座于太
學堂正中南向莞筵紛純加藻席畫純次席黼純設三
老座于西楹近北東向設五更座次三老東向皆莞筵

粉純加藻席畫純設羣老位于西階上東向皆蒲筵緇布純加莞席玄帛純凡席皆不相屬設致政之老與其孤館幕于門外太常卿展宮懸列舞綴于庭設升歌于堂上及舉麾位等一如元會之儀有司設罇于東楹之西北向左玄酒有坫以置爵前期一日有司具牲帛祭器祭先師孔子上遣官行禮齋宿省牲陳設奠馔一如丁祭之儀惟祝文曰維某年月日朔甲子皇帝謹遣某致祭于先師孔子是月某日養三老五更羣老于太學

用幣敬伸奠告以顏子曾子子思子孟子配尚享味爽
卒事復命又設先老位于廟門之前陳設如儀至日黎明
鼓徵警衆設六佾舞生皆至駕乃出宮太學官率諸
生迎駕于太學路左駕至太學官及諸生俯伏稽首興
傳制迎三老五更于其第三老五更俱朝服乘安車導
從如常儀擇史官充惇史二人朝服從之其羣老及致
政之老與其孤則有司先戒之宿于太學以俟駕至太
學堂上命官釋奠于先老禮畢太常卿導上入御幄易

冠服出陞御座執大圭協律郎跪俯伏舉麾金奏姑洗
之均樂止太常少卿導三老五更皆杖各二人夾扶左
右惇史執筆以從自西階升堂上與揖遜欲拜三老五
更去杖攝齊皆稽首遜辭上不果拜乃揖就座三老五
更皆坐三老授几九卿正履進珍饈及黍稷等上省之
遂設于三老五更前工升歌鹿鳴三終太常卿引上詣
三老座前以大珪授侍臣執醬而饋訖有司以次進珍
饈酒食于五更前又設酒食于羣老前太常卿引上詣

酒罇所取爵贊酌酒訖太常卿引上詣三老座前執爵而酌訖上即座三老以下皆坐光祿卿進酒上飲酒三老以下坐食飲酒各三爵筮入三終光祿卿進加餽羹飲酒各三爵間歌三終三老乃論父子君臣長幼之道治政之要五更飲亦如之上俱虛躬聽受惇史執筆錄之乃大合六樂羽舞大韶以雲門咸池合之干舞大武以大夏大濩合之上興冕而總干三老以下皆興稽首遜辭上復即座三老以下皆復坐飲酒各三爵樂九變

畢太常卿跪奏樂闋致政之老與其孤館于門外者飲酒食畢皆入侍制命有司曰養爾老幼毋違朕命三老以下趣出賜三老五更襲衣冠帶牢醴綵幣其餘帛衣米肉三老以下序立于庭皆拜三稽首興分班序立有司奏禮畢上興出就駕還宮明日三老率五更以下詣闕表謝

蕙田案視學養老之禮後世惟漢明帝魏高貴鄉公北魏孝文帝周武帝行之如北齊唐

宋明雖有養老辟雍之儀其實皆未之行也

右歷代視學養老之禮

漢書高祖本紀二年二月舉民年五十以上有修行能帥衆為善置以為三老鄉一人擇鄉三老一人為縣三老與縣令丞尉以事相教後勿繇以十月賜酒肉

文帝本紀元年三月詔曰老者非帛不煖非肉不飽今歲首不時使人存問長老又無布帛酒肉之賜將何以佐天下子孫孝養其親今閭吏稟當受鬻者或以陳粟

宜稱養老之意哉具為令有司請令縣道年八十以上
賜米人月一石肉二十斤酒五斗其九十以上又賜帛
人一疋絮三斤賜物及當稟鬻米者長吏閱視丞若尉
致不滿九十嗇夫令史致二千石遣都吏循行不稱者
督之刑者及有罪耐以上不用此令

武帝本紀建元元年春二月賜民爵一級年八十復二
算九十復甲卒夏四月己巳詔曰古之立教鄉閭以齒
朝廷以爵扶世導民莫善於德然則於鄉里先耆艾奉

高年古之道也今天下孝子順孫願自竭盡以承其親外迫公事內乏資財是以孝心闕焉朕甚哀之民年九十以上已有受囑法為復子若孫令得身帥妻妾遂其供養之事

元狩元年夏四月詔曰朕嘉孝弟力田哀夫老眊孤獨鰥寡或置於衣食其憐愍焉其遣謁者巡行天下存問致賜曰皇帝使謁者賜縣三老孝者帛人五匹鄉三老弟者力田帛人三匹年九十以上及鰥寡孤獨帛人二

匹絮三斤八十以上米人三石

宣帝本紀地節三年春三月詔加賜鰥寡孤獨高年帛二千石嚴教吏謹視遇毋令失職

元康四年春正月詔曰朕惟耆老之人髮齒墮落血氣衰微亦亡暴虐之心今或羅文法拘執囹圄不終天命朕甚憐之自今以來諸年八十以上非誣告傷人他皆勿坐

元帝本紀建昭四年夏四月詔遣諫大夫博士賞等二

十一人循行天下存問耆老

平帝本紀元始元年春正月詔天下吏比二千石以上
年老致仕者參分故祿以一與之終其身

後漢書世祖本紀建武六年春正月辛酉詔郡國有穀
者給粟高年二十石勉加循撫無令失職

章帝本紀章和元年秋七月壬戌詔曰秋令是月養衰
老授几杖行糜粥飲食其賜高年二人共布帛各二匹
以為醴酪

和帝本紀永元十五年秋九月壬午南巡守賜所過三老官屬及民百年者錢布各有差

安帝本紀元初四年秋七月辛丑詔曰月令仲秋養養老授几杖行糜粥方今案比之時郡縣多不奉行雖有糜粥糠粃相半長史怠事莫有躬親其違詔書養老之意其務崇仁恕賑護寡獨稱朕意焉

順帝本紀陽嘉三年五月戊戌詔賜民年八十以上米人一斛肉二十斤酒五斗九十以上加賜帛人二匹絮

三斤

桓帝本紀建和二年春正月皇帝加元服大赦天下年八十以上賜米酒肉九十以上加帛二匹綿三斤

永興二年十一月校獵上林苑遂至函谷關賜所過道傍年九十以上錢各有差

魏志明帝本紀太和六年三月癸酉行東巡所過存問高年

晉書惠帝本紀永平元年五月壬午賜高年鰥寡力田

者帛人三匹

成帝本紀咸和元年春二月丁亥賜鰥寡孤老米人二斛

宋書孝武帝本紀大明七年二月詔故邑耆舊在目罕存年世未遠已殲大半撫迹惟事傾慨兼著太宗燕故晉陽洽恩世祖流仁濟畿暢澤永言往猷思廣前賚遣使巡慰厚賜粟帛高年加以羊酒冬十月車駕巡南豫州詔曰朕巡幸所經先見百年者及孤寡老疾並賜粟

帛十二月行李歷陽高年孤疾賜帛十匹

南齊書武帝本紀永明五年春正月辛卯詔諸孤老並

賜糧餼

魏書太武帝本紀太延元年十一月丙子行李鄴諸所
過對問高年

太平真君七年二月丙戌幸長安存問父老

文成帝本紀和平二年三月幸中山至于鄴遂幸信都
輿駕所過皆親對高年間民疾苦詔民年八十以上一

子不從役 四年春三月乙未賜京師民年七十以上
太官厨食以終其年

孝文帝本紀延興三年十一月戊寅詔年八十以上一
子不從役癸巳太上皇帝南巡至于懷州所過賜高年
布帛

太和元年冬十月癸酉宴京邑耆老年七十以上于太
華殿賜以衣服又詔七十以上一子不從役 三年夏
五月辛酉詔曰昔四代養老問道乞言朕雖冲昧每尚

其美今賜國老各衣一襲綿五斤絹布各五疋十一月
癸卯賜京師貧窮高年疾患不能自存者衣服布帛各
有差 四年秋七月壬子改作東明觀詔會京師耆老
賜錦線衣服几杖稻米蜜麪復家人不徭役 十六年
十二月賜京邑老人鳩杖 十七年八月壬寅車駕至
肆州民年七十以上賜爵一級戊申幸并州親見高年
問所疾苦九月戊辰濟河詔洛懷并肆所過四州之民
百年以上假縣令九十以上賜爵三級八十以上賜爵

二級 十八年春正月車駕南巡詔相克豫三州百年
以上假縣令九十以上賜爵三級八十以上賜爵二級
七十以上賜爵一級孤老鰥寡不能自存者賜粟五石
帛二匹秋七月車駕北巡八月南還所過皆親見高年
問民疾苦貧窮孤老賜以粟帛丙寅詔六鎮及禦夷城
人年八十以上而無子孫兄弟終身給其廩粟七十以
上家貧者各賜粟十斛又詔諸北城人年滿七十以上
及廢疾之徒校其元犯以準新律事當從坐者聽一身

還鄉又令一子扶養終命之後乃遣歸邊餘如此之犯
年八十以上皆聽還十一月辛亥未朔詔冀定二州民百
年以上假以縣令九十以上賜爵三級八十以上賜爵
二級七十以上賜爵一級鰥寡孤獨不能自存者賜以
穀帛十二月丁卯詔郟豫二州之民百齡以上假縣令
九十以上賜爵三級八十以上賜爵二級七十以上賜
爵一級孤寡鰥老不能自存者賜以穀帛 十九年夏
四月辛亥詔賜百歲以上假縣令九十以上賜爵三級

八十以上賜爵二級七十以上賜爵一級孤寡老疾不能自存者賜以穀帛六月壬子詔濟州東郡滎陽及河南諸縣車駕所經者百年以上賜假縣令九十以上賜爵三級八十以上賜爵二級七十以上賜爵一級孤老鰥寡不能自存者賜以穀帛冬十月甲辰曲赦相州民百年以上假郡守九十以上假縣令八十以上賜爵三級七十以上賜爵二級孤老痼疾不能自存者賜以穀帛二十年二月丙午詔畿內七十以上暮春赴京師

將行養老之禮三月丙寅宴羣臣及國老庶老于華林
園詔國老黃耆以上假中散大夫郡守者年以上假給
事中縣令庶老直假郡縣各賜鳩杖衣裳二十一年
春正月乙巳車駕北巡二月壬戌次于太原親見高年
問所不便乙丑詔并州士人年六十以上假以郡守三
月乙未車駕南巡己酉次離石甲寅詔汾州民百年以
上假縣令九十以上賜爵三級八十以上賜爵二級七
十以上賜爵一級夏四月辛未行幸長安乙亥親見高

年間所疾苦五月己丑車駕東旋庚寅詔雍州士人百
年以上假華郡太守九十以上假荒郡八十以上假華
縣令七十以上假荒縣庶老以年各減一等七十以上
賜爵三級孤寡鰥貧窮痾廢疾各賜帛二匹穀五斛秋
九月丙申詔曰哀貧恤老王者所先鰥寡六疾尤宜矜
愍可勅司州洛陽之民年七十以上無子孫六十以上
無期親貧不自存給以衣食及不滿六十而有廢痾之
疾無大功之親窮困無以自療者皆于別坊遣醫救護

給醫師四人豫請藥物以療之

孝明帝本紀熙平二年夏四月丁酉詔京尹所統百年以上賜大郡板九十以上賜小郡板

神龜元年春正月壬申詔京畿百年以上給大郡板九十以上給小郡板八十以上給大縣板七十以上給小縣板諸州百姓百歲以上給小郡板九十以上給上縣板八十以上給中縣板鰥寡孤獨不能自存者賜粟五

斛帛二匹

正光四年秋七月詔曰達尊斯在齒頰一焉崇敬黃耆
先代通訓故方叔以元老處位充國緣自強見留雖七
十致仕明乎典故然以德尚壯許其繫維今庶寮之中
或年迫懸車循禮宜退但少收其力老棄其身言念勲
舊矐然未忍或戴白在朝未當外任或停私厯紀甫受
考級如此之徒雖滿七十聽其蒞民以終常限或新解
郡縣或外佐始停已滿七十方求更敘者吏部可依令
不奏其有高名俊德老成髦士灼然顯達為時所知者

不拘斯例若才非秀異見在朝官依令合解者可給本官半祿以終其身使辭朝之叟不恨歸于閭巷矣

北齊書文宣帝本紀天保九年秋九月辛丑給京畿老人劉奴等九百四十三人板職及杖帽各有差

孝昭帝本紀皇建元年秋八月乙酉詔諸郡國老人各授板職賜黃帽鳩杖

周書明帝本紀二年夏六月己巳板授高年刺史守令武帝本紀保定元年春正月甲戌詔先經兵戎官年六

十已上及民七十已上節級板授官 三年秋七月丁

丑幸津門問百年賜以錢帛又賜高年板職各有差

建德二年冬十二月癸巳詔曰尊年尚齒列代宏規序

舊酬勞哲王明範朕嗣承宏業君臨萬邦驅此兆庶寘

諸仁壽軍民之間年多耆耄眷言衰暮宜有優崇可頒

受老職使榮霑邑里

隋書高祖本紀開皇七年冬十月癸亥幸蒲州丙寅宴

父老

煬帝本紀大業五年春二月丙辰宴耆舊四百人于武
德殿頒賜各有差冬十月癸亥詔曰優德尚齒載之典
訓尊事之言義彰膠序鸞熊為師取非筋力方叔元老
克壯其猷朕永言稽古用求至治是以龐眉黃髮更令
收敘務簡秩優無虧藥膳庶等卧治佇其宏益今歲者
老赴集者可于近郡處置年七十以上疾患沈滯不堪
居職即給賜帛送還本郡其官至七品以上者量給廩
以終厥身 七年春二月幸于涿郡壬午詔曰今往涿

郡巡撫民俗其河北諸郡及山西山東年九十以上者
板授太守八十者授縣令

冊府元龜唐高祖武德二年幸穰州召父老置酒高會
賜帛 五年三月宴京城父老賜帛

唐書太宗本紀貞觀三年四月戊戌賜孝義之家粟五
斛八十以上二石九十以上三石百歲加絹二疋

冊府元龜貞觀三年十月幸隴州詔岐隴二州八十以
上賜物百歲以上大加優恤

唐書太宗本紀貞觀五年十二月癸卯賜新進士高年帛
六年三月丁丑賜民八十以上粟帛

冊府元龜貞觀六年五月宴長安父老九月幸慶善宮
賜故老帛 十一年正月宴長安父老于元武門賜以
穀帛三月幸洛陽宮宴父老于乾元殿賜以粟帛

唐書太宗本紀貞觀十五年四月乙未賜民八十以上
物

冊府元龜貞觀十五年正月如洛陽所過賜高年穀帛

十一月蒐于伊闕詔所經之縣遣使存問高年賜帛各有差 十八年十月癸卯以將征高麗宴雍州父老百歲以上氈被袍各一帛十匹粟十石九十以上物五段粟五石八十以上物三段粟三石十一月壬申至雒州遣使齎璽書詣鄭汝懷澤四州問高年宴賜各有差壬午宴雒州父老一百九十人于儀鸞殿班賜有差 十九年二月發雒陽征遼所經州縣高年賜粟帛辛亥及河陽女子呂年百歲太宗幸其宅存問之賜氈帛袍各

一綿帛十段次汲縣女子翟張並年百歲太宗幸其宅
存問之賜物如河陽十月次營州召父老年七十以上
賜緞帛綾錦等

永徽六年十月八十以上老人各賜粟二石帛三段百
歲以上各賜粟五石帛十段

顯慶二年正月幸雒陽二月父老百歲以上賜氈被一
具袍一領絲絹十段粟二十石仍遣使就家存問九十
以上賜絲絹五段十月幸鄭州賜八十以上老人粟帛

有差閏十二月以駕幸東都詔所經處八十以上老人
賜氈被袍綿及粟有差

唐書高宗本紀顯慶五年正月甲子如并州己巳次長
平賜父老布帛二月丙戌赦并州及所過州縣民年八
十以上版授刺史縣令三月丙午皇后宴親族鄰里于
朝堂婦人八十以上版授郡君賜氈衾粟帛

冊府元龜龍朔元年九月駕幸河南縣婦人張氏年百
三歲遂賜絹三十匹氈被一具皇后太子亦親問賜以

衣及繪綵

唐書高宗本紀總章二年九月壬寅如岐州乙巳賜高
年粟帛

冊府元龜咸亨元年十一月將幸東都宴京城父老有
不能行者仍許子弟扶至殿庭賜物及黃帔而遣之

開元二年九月引京師侍老宴于含元殿庭詔曰古之
為政先于尚老居則致養禮傳三代行則就見制問百
年蓋皇王之勸人教黎庶之為子朕寅奉休歷祗膺聖

謨因秋歸而歲成屬星見于郊祀念其將至尤重乞言俾伸恩于几杖期布惠于鄉國九十以上宜賜几杖八十以上宜賜鳩杖所司準式天下諸州侍老宜令州縣便設酒食一准京城賜几杖其婦人則送几杖于其家三年十月詔古者親問百年義在養老其待老年九十以上賜物四段綿帛各一匹

天寶元年正月改元詔天下侍老八十以上者宜委縣官每加存問仍量賜粟帛侍丁者令其養母孝假者於

其在喪此王政優容俾伸情理而官吏不依令式多雜
役使自今以後更不得然 八載閏六月冊尊號禮畢
詔高年給屬存養因時定式務廣仁恩其天下百姓夫
夫七十以上婦人七十五以上宜各給一人充侍仍自
簡擇至八十以上依常式處分

長慶元年正月郊祀禮畢大赦天下百姓高年者賜粟
及綿絹有差三月詔官內高年不能自存者差官就問
給賜粟帛

冊府元龜後唐同光元年四月即位制曰應諸道管內有高年踰百歲者便與給復永俾除名自八十至九十者與一子免役州縣不得差徭

天成二年十月辛丑詔曰敬老之規前王所重養親之道為子居先應有年八十以上及家長有廢疾者宜免一丁差役俾遂奉養

後晉天福二年四月丁亥制曰洪荒之內鄉黨之中宜宏養老之規式表閭年之道天下百姓有年八十以上

者與免一丁差徭仍令逐處簡畧上位官

宋史太祖本紀開寶五年春正月庚子前盧縣尉鄆陵許永年七十有五自言父瓊年九十九兩兄皆八十餘乞一官以便養因召瓊厚賜之授永鄆陵令

太宗本紀淳化四年春二月壬戌召賜京城高年帛百歲者一人加賜塗金帶是日雨雪大寒再遣中使賜孤老貧窮人千錢米炭

真宗本紀咸平二年冬十一月辛丑賜京城父老衣帛

十二月戊午駐蹕澶州壬戌賜澶州父老錦袍茶帛甲子次大名丁卯召見大名府父老勞賜之

景德元年秋七月庚子益都民李仁美國凝母皆百餘歲詔賜粟帛四年春正月己未車駕發京師庚申次中牟縣賜父老衣幣所過如之二月甲申御五鳳樓觀酺詔父老五百人賜飲樓下

大中祥符元年二月壬辰御乾元門觀酺賜父老千五百人衣服茶綵十月宴太山父老子殿門賜父老時服

茶帛 三年春正月丁巳賜建安軍父老江禹錫粟帛
閏二月戊辰詔赤縣父老本府宴犒年九十者授攝官
賜粟帛終身八十者壽一級秋八月乙亥河中府父老
千七百人來迎上勞問之賜以緡帛 七年三月青州
民趙嵩百一十歲詔存問之 八年泗州周憲百五歲
詔賜東帛

仁宗本紀天聖元年三月丙子詔賜城中民八十以上
者茶帛仍復其家

王圻續通考景定四年正月詔曰周尊黃耆忠厚所基
漢事三老祿養無缺陳壇林彬之史季溫夙被擢用今
皆耆年奉祠歲久宜示獎崇陳壇授端明殿學士林彬
之寶謨閣待制史季溫直文華閣各因其祠

遼史聖宗本紀統和十二年正月霸州民李在宥年百
三十有三賜束帛錦袍銀帶仍復其家 十六年六月
詔婦人年踰九十者賜物

太平四年二月詔賜諸官分耆老食

道宗本紀大安十年十二月三河縣民孫賓及其妻皆百歲復其家

金史海陵本紀天德三年四月沂州男子吳真犯法當死有司以其母老疾無侍為請命官與養濟著為令

世宗本紀大定十六年十二月詔諸流移人老疾者官與養濟 二十五年四月詔會寧府百姓年七十以上者補一官九月次轄沙河賜百歲老嫗帛申申次遼水召見百二十歲女真老人能道太祖開創事上嘉歎賜

食子賜帛

王圻續通考元世祖至元時順天路民王住兒過誤致死罪其母年七十言于朝曰兒死則妾亦死矣乃宥其罪俾養母

蕙田案親老獨子留養之例蓋始於此

觀承案獨子留養元世祖此舉實為盛德之事聖人孝治天下推恩至於此極孝悌之心可以油然而生矣然亦以其過誤而致罪者耳

故恩不傷義而足為後世法也

元史成宗本紀大德九年六月立皇子德壽為皇太子
詔賜高年帛八十者一匹九十者二匹親年七十別無
侍丁者從近遷除

仁宗本紀至大四年三月賜大都路民年九十者二千
三百三十一人人帛二匹八十者八千三百三十一人
人帛一匹

文宗本紀至順二年四月寧國路涇縣民張道殺人為

盜道弟吉從而不加功拘囚七年不決吉母老無他子
孫中書省臣以閩勅免死杖而出之俾養其母

順帝本紀至元四年正月詔內外廉能官父母年七十
無侍丁者附近銓注以便侍養

至正元年十二月詔民年八十以上蒙古人賜緡帛一
表裏其餘州縣旌以高年耆德之名免其家雜役

明會典洪武元年詔民年七十以上者許一丁侍養與
免雜泛差役

王圻續通考洪武五年壬子夏五月詔中外學宮行養
老之禮先是太祖念海內晏安思化民俗以復其古遂
命禮部考儀禮及唐宋之制又采周官屬民讀法之旨
參定每歲孟春正月冬十月有司偕學官率士大夫之
老者行之于學宮其民間里社以百家為一會糧長或
里長主之百人內以年最長者為正賓餘以齒序坐每
季行之于里中大都皆本于正齒位之說而賓與賢能
春秋習射亦可通行焉酒脯不許奢靡制曰可遂詔應

天府及直隸府州縣并各布政司府州縣俱舉行之

明會典洪武十九年詔所在有司審耆老不係隸卒倡
優年八十九十鄰里稱善者備其年申行實具狀奏聞
貧無產業者八十以上月給米五斗肉五斤酒三斗九
十以上歲加給帛一匹絮五斤雖有田產僅足自贍者
所給酒肉絮帛亦如之其應天鳳陽二府富民年八十
以上賜爵里士九十以上賜爵社士皆與縣官平禮並
免雜差正官歲一存問著為令

二十年閏六月命試禮部尚書李原名申諭有司行養
老之政先是太祖名原名諭之曰尚齒所以教敬事長
所以教順虞夏商周之世莫不以齒為尚而養老之禮
未嘗廢是以人興於孝弟風俗淳厚治道隆平曩者朕
詔天下行養老之政凡耆民年八十九十鄉黨稱善者
有司以時存問若貧無產業年八十以上者月給米五
斗酒米三斗肉五斤九十以上歲加帛一疋綿一斤其
有田產能自贍者止給酒肉絮帛其應天鳳陽二府富

民九十以上賜爵里士八十以上賜爵社士咸冠帶復其家尚虞有司奉行不至爾其以朕命申之

永樂二十二年令民年七十以上及篤廢殘疾者許一丁侍養不能自存者有司賑給八十以上者仍給絹二疋綿二斤酒一斗時加存問

天順二年詔軍民有年八十以上者不分男婦有司給絹一疋綿一斤米一石肉十斤年九十以上者倍之男子百歲加以冠帶祭身又詔四品以上官年七十以禮

致仕不能自存者有司歲給米五石 八年詔凡民年

七十以上者免一丁差役有司每歲給酒十瓶肉十斤
八十以上者加與綿二斤布二疋九十以上者給與冠
帶每歲設宴待一次百歲以上給與棺具

成化二十三年詔在京文職以禮致仕五品以上年及
七十者進散官一階其中廉貧不能自存衆所共知者
有司仍每歲給與食米四石不許徇情濫給

弘治十八年詔文職官員五品以上以禮致仕在家者

各進階一級其二品以上大臣年及八十者有司備綵幣羊酒問勞九十以上者具奏遣使存問

嘉靖元年大職致仕一品未受恩典者有司月給食米二石歲撥人夫二名應用二品以上年及八十者備綵幣羊酒問勞九十以上者具實奏來遣使存問五品以上以禮致仕年七十以上者進散官一階其中廉貧不能自存衆所共知者歲給米四石以資養贍

王圻續通考明尊年恩例高皇帝時詔諸耆老謁見而

崑山周壽誼居首年一百十六歲賜宴及鈔幣天順中
召京師人百四歲茹大中入見便殿賜宴順天府賜冠
帶襲衣命禮部尚書姚夔造其第賀之成化中濟寧人
王自能以百十六歲徵又七年終又韓王奏羣牧所千
戶朱致魯祖信年一百六歲而終祖全一百二歲父鏞
八十二歲見存三代皆以千戶致仕詔信全俱進階宣
武將軍各賜羊酒白米二石

右歷代優老之事

五禮通考卷一百七十七